

XXXIX PREMIO DI POESIA  
in DIALETTO VENETO "BRUNO TOSI"  
bandito da FONDAZIONE FIORONI - MUSEI E BIBLIOTECA PUBBLICA -  
LEGNAGO VR

BATE ON SOLE SLANGORIO

Davanti a on foio d'anima  
me cato squilibrà tra el silenzio  
e on mucio de parole.  
Le franze de le cuerte  
jè come canpanele che non sona  
su le spale del me leto,  
in do ghe on cucio  
che smarisse i sogni.

Lavari de late  
i basa on giorno novo...

Su la strada el bacan  
el riva dal furgon de le ratatuje,  
che gira longo el zercio de on confin  
segnà da caruare fonde.

Me inbotono  
i duo oci de madreperla  
de la blusa che me meto...

Bate on sole slangorio  
sul core nudo...

Su le massele co le pane del specio  
voria spianzar el profumo  
de na bozetina quasi uda  
e smissirlo a quello dei jazinti,  
che non ga oja de stravanire  
drento a un vero limegà.  
Lì, in on vaso de cristalo,  
che pianze la loza del tempo,  
ma che oncora el spenela de colore  
la tola infregolà  
da chela boca che sgagna  
le groste de la vita.

*Luciana Gatti*